

# LOD BILTEN

JAČANJE LOKALNE DEMOKRATIJE / DEMOKRACIJE

MART / OŽUJAK 2016.



★ U Cazinu svoju budućnost vide u bavljenju pčelarstvom ★ Centar za socijalni rad Šamac zablistao u novom ruhu ★ „Dnevnik jedne djevojke“ govori o odrastanju u BiH na zanimljiv, dinamičan i poučan način ★ Šamac: Stari zanat za nove poslovne mogućnosti ★ Berkovići dobili moderan resursni centar ★ Žubor“ čuva i promoviše kulturu i tradiciju kotorvaroškog kraja ★ BiH se pridružila obilježavanju Dana sigurnosti na internetu ★ Bosna i Hercegovina predala aplikaciju za članstvo u EU ★

Zahvaljujući ovom projektu 17 osoba je naučilo kako se pletenjem industrijske vrbe izrađuju korpe, stolice i mnogi drugi ukrasni i upotrebni predmeti

A group of people are gathered in a large, bright room with white walls and a high ceiling. They are working on large, circular, woven structures made of reeds or straw. One person is standing in the center, observing the work. The room has large windows on the right side, and the floor is covered with the woven structures and some tools.



# CENTAR ZA SOCIJALNI RAD ŠAMAC ZABLISTAO U NOVOM RUHU

Obnovljeni Centar za socijalni rad sad pruža široku paletu usluga za zajednicu, kako za najranjivije grupe tako i za djecu sa poteškoćama u razvoju i odrasle sa invaliditetom



Centar za socijalni rad u Šamcu je samo jedna od institucija koje su u potpunosti bile poplavljene i uništene u katastrofalnim poplavama u maju 2014. godine. Zahvaljujući finansijskoj podršci međunarodnih donatora i Opštine Šamac Centar je obnovljen i opremljen, a u decembru 2015. godine je otvorio svoja vrata za korisnike.

Evropska unija je kroz projekat „Jačanje lokalne demokratije/demokracije LOD IV“ osigurala sredstva za opremanje Centra za socijalni rad kao i za nabavku materijala za rad, što će uposlenicima omogućiti kvalitetniji i bolji rad sa korisnicima.

Prilikom otvaranja, Sezin Sinanoglu, rezidentna koordinatorka UN-a i rezidentna predstavnik UNDP-a u BiH je izrazila zadovoljstvo napravljenim.

„Veoma smo ponosni što će Centar, koji je izgrađen po principu ‘bolje ponovne izgradnje’ sada biti energetski efikasniji te će Opštini Šamac uštediti novac koji se može koristiti za pružanje direktnih usluga njihovim korisnicima. Bitno je naglasiti da se svi mi moramo okrenuti ka budućnosti te povisiti naš nivo spremnosti za buduće elementarne nepogode i zaštitu od njih“, istakla je Sinanoglu.

Kapaciteti Centra su povećani te je omogućeno pružanje usluge za preko 1.500 korisnika godišnje. Direktor Centra za socijalni rad u Šamcu, Veljko Milkić istakao je da je zgrada koju su koristili prije poplava potpuno uništena u poplavama i nije bila uslovna za rad.

**„Nova zgrada omogućit će da ponovo počnemo pružati usluge za 1.500 korisnika, kao i da poboljšamo i proširimo obim usluga posebno za djecu i mlade sa**

**poteškoćama u fizičkom i mentalnom razvoju. To je usluga koja do sada nije bila dostupna u Šamcu“,** kazao je Milkić.



Obnovljeni Centar za socijalni rad sad pruža široku paletu usluga za zajednicu, kako za najranjivije grupe tako i za djecu sa poteškoćama u razvoju i odrasle sa invaliditetom. Novoizgrađeni objekat će imati i Dnevni centar za djecu i mlade, što je usluga koja nije prije bila dostupna u Šamcu.

U okviru ovog projekta organizovana je i obuka roditelja odnosno psihosocijalna pomoć, radionica za roditelje djece sa smetnjama u razvoju te razmjena iskustva sa Dnevnom centrom iz Dervente.



# DNEVNIK JEDNE DJEVOJKE

## GOVORI O ODRASTANJU U BIH NA ZANIMLJIV, DINAMIČAN I POUČAN NAČIN

Vodeći se idejom da ključnu ulogu u razvoju današnjeg društva igraju mladi, te da budućnost ovisi o njihovom radu i zalaganju za okolinu, Vijeće mladih Općine Novo Sarajevo i Asocijacija XY realizuju projekat „Aktivizmom mladih protiv nasilja u Općini Novo Sarajevo“.

Cilj projekta je aktivirati mlade sa područja ove lokalne zajednice u prevenciji maloljetničkog nasilja i delikvencije, a uz to promovisati zdrave stilove života. Kroz projekat su realizovane brojne radionice i edukativne prezentacije, kojima je obuhvaćeno osam osnovnih škola sa područja Općine Novo Sarajevo, a posebnu pažnju među više od 1.400 učenika koji su učestvovali na prezentacijama pobudio je „Dnevnik jedne djevojke“, brošura posvećena prevenciji nasilja i promociji omladinskog aktivizma za učenike i učenice osmog i devetog razreda osnovne škole.

Riječ je o edukativnom materijalu koncipiranom kao dnevnik koji piše jedna djevojčica. Nakon dugogodišnjeg rada sa mladima, Dajana Cvjetković iz Asocijacije XY smatra da je ovoj populacijskoj skupini najbolje pristupiti iz ugla njihovih vršnjaka i na taj način prenijeti poruke i educirati ih o životnim temama na koje ne mogu dobiti odgovor iz svoje bliske okoline.

**„Dnevnik jedne djevojke predstavlja vrlo bitan vid edukacije ne samo za mlade već i**


**za njihove roditelje. Ako postavimo pitanje: Šta znači biti tinejdžerka u Sarajevu u 21. vijeku, i dobijemo odgovor: Znači biti moderna, zanimljiva, pametna, okružena mnogobrojnim tehnološkim i kulturnim mogućnostima, onda moramo spomenuti i tabue o osnovnim temama odrastanja, nedoumicama, i lažnim prijateljstvima. Svaka mlada osoba se na neki način susreće sa problemima održavanja prijateljstva, sticanja povjerenja ili iskrene komunikacije putem društvenih mreža. Sve bi to bilo normalno i prihvatljivo da u školi učimo o promjenama tijela, emocija, hormonima ili seksualnosti. Odrastamo u svijetu koji seksualizira svaku poru društva, od muzike, mode, filma ili zabave a zanemaruje individualne potrebe, načine razvoja seksualnosti, naučna objašnjenja tjelesnog rasta i razvoja, medicinski ispravno tretiranje promjena ili prihvatljivu izgradnju socijalnih veza“,** kazala je Dajana i dodala da je riječ o jedinstvenoj publikaciji na bh. tržištu.

Publikacija nije namijenjena samo mladima, već i njihovim roditeljima, koji u ranoj fazi odrastanja nisu mogli u svojoj okolini da pronađu odgovore na pitanja iz svakodnevnice sa kojima su se suočavali.

Prema riječima Jasne Agić, čija je kćerka Hana učenica jedne osnovne škole u Sarajevu, „Dnevnik jedne djevojke“ predstavlja istinski edukativno štivo koje može mnogo pomoći roditeljima u odgoju djece.

„Već nakon prvih nekoliko stranica čitanja shvatila sam da u rukama držim štivo koje je nedostajalo meni kao djevojčici, ali i mojim roditeljima, kako bismo se se suočili sa svakodnevnim problemima koji prate pubertet i odrastanje. Mnoge odgovore na pitanja koja sam postavljala samoj sebi pronašla sam u publikaciji. Prestala sam da poredim svoje djetinjstvo sa djetinjstvom svoje djece. Radi se o dijametralno suprotnim vremenskim periodima, a svako od njih ima svoje karakteristike. Umjesto osuđivanja socijalnih mreža pokušavam da shvatim takav način komunikacije i da usmjerim svoju djevojčicu u pravom smjeru“, kazala je Agić.

„Dnevnik jedne djevojke“ biće distribuiran starijim razredima osnovnih škola u Kantonu Sarajevo, a zbog svog prepoznatljivog i originalnog dizajna, te zbog praktičnosti i edukativnog karaktera predstavlja idealan poklon za svakog učenika i učenicu.



# U CAZINU SVOJU BUDUĆNOST VIDE U BAVLJENJU PČELARSTVOM

Krajnji korisnici projekta su 24 nezaposlena lica iz kategorije mladih u rasponu od 18-30 godina

S obzirom na visoku stopu nezaposlenosti na području općine Cazin i Unsko-sanskog kantona, a imajući u vidu potencijale i prirodne resurse koje ima ovo područje, pčelarstvo predstavlja vrlo respektabilnu granu poljoprivrede.

Kako bi doprinijeli smanjenju nezaposlenosti mladih, žena i socijalno ugroženih lica Udruženje pčelara „Kesten“ Cazin je pokrenulo projekat „Mala škola pčelarstva“ koji ima za cilj unaprijediti znanja mladih, žena i socijalno ugroženih lica za samostalno bavljenje pčelarstvom.

Krajnji korisnici projekta su 24 nezaposlena lica iz kategorije mladih u rasponu od 18-30 godina (od kojih je osam žena) i šest lica iz ostalih socijalnih kategorija. Tokom 11 mjeseci trajanja projekta, realizovane su teoretske i praktične obuke koje su se odvijale na pčelinjacima certificiranih pčelara koji su članovi udruženja.

Obuci je prethodila nabavka opreme koja je korištena za potrebe projekta, ali i ka-



snije za aktivnosti Udruženja, a izrađen je i Priručnik za pčelare – početnike. Nakon objave Javnog poziva za obuku, interes građana općine Cazin je bio ogroman, pa je planirani broj od 30 kandidata vrlo brzo dostignut.

„Već duže vrijeme namjeravam da se počnem baviti pčelarstvom, jer je to prilika da osiguram egzistenciju za svoju porodicu. U tom smislu sam se nastojao educirati putem interneta i literature. Međutim, često sam nailazio na zastarjele informacije, a nisam imao ni priliku da steknem praktična iskustva u ovoj oblasti. Kada sam čuo za ovaj projekat, bez razmišljanja sam se odlučio upisati, a jedan od razloga je i taj što su predavači iskusni pčelari - praktičari od kojih mogu puno naučiti, što će mi olakšati započinjanje moje pčelarske karijere“, kazao je Vedran Mahmutović, jedan od polaznika škole pčelarstva.

Kroz ovaj projekat iskusniji pčelari, koji su radili kao instruktori, među kandidatima su stekli nove partnere. Cazin se tako može pohvaliti da sada ima 30 novih educiranih pčelara koji će imati odgovoran odnos prema onome što rade, a što će u konačnici uticati na prevenciju pojave zaraznih bolesti kod pčela, kao i drugih neželjenih posljedica, čime će direktno podsticati razvoj pčelarstva na ovim prostorima. Organizatori obuke se nadaju da će budući pčelari kroz profesionalan rad obezbijediti i kvalitetan proizvod s kojim će moći ostvariti i značajan novčani prihod.



# “ŽUBOR” ČUVA I PROMOVIŠE KULTURU I TRADICIJU KOTORVAROŠKOG KRAJA



Ansambel „Žubor“ je januarskim nastupom pred brojnom publikom u Kotor Varošu privleo kraju aktivnosti na projektu „Očuvanje tradicionalne pjesme i igre“ i time na najbolji način probudio uspavanu kulturnu scenu.

Cilj projekta, koji je trajao šest mjeseci, je bio promovirati i očuvati kulturu i tradiciju kotorvaroškog kraja te povećati broj kulturnih aktivnosti u ovoj lokalnoj zajednici. Sirovašna kulturna scena i nedovoljna angažo-

vanost mladih u vannastvnim aktivnostima bili su povod nastanku ovog projekta.

Kroz projekat su, kako bi se afirmisao što veći broj mladih, organizovane kreativne radionice na kojima su mladi (40 dječaka i 30 djevojčica) mogli, kroz pjesmu i igru, ispoljiti svoja osjećanja i kreativnost te druženje sa svojim vršnjacima učiniti sadržajnijim. U isto vrijeme, kroz škole sviranja i pjevanja sa mladima koji su iskazali sklonost ka muzici, radilo se dodatno na usavršavanju talenta čime je njihovo slobodno vrijeme ispunjeno na kvalitetan način. Ansambel koji djeluje od 2011. godine također nije posjedovao neophodnu opremu za nesmetan rad, pa je ovaj projekat bio prilika i za nabavku novih instrumenata, te tradicionalne nošnje.

Novi članovi ansambla su, zahvaljujući projektu, imali priliku da kroz pet gostovanja u

mjesnim zajednicama i na praktičan način dožive i osjete sve čari nastupa pred publikom što im je bila dodatna motivacija za rad i učenje.

**„Muzičko mi je omiljeni predmet u školi. Drago mi je da smo u sklopu projekta kroz radionice i mi u školi u Maslovarama imali priliku da naučimo nešto novo o muzici. Planiram da nakon završetka osnovne škole upišem muzičku školu i tako dam doprinos u razvoju muzičke kulture i tradicije u svom mjestu“**, oduševljena je bila nakon radionica i svojih prvih nastupa Miljana Kragić.

Kulturna scena u Kotor Varošu je definitivno obogaćena, a kreativne radionice su potvrdile činjenicu da u ovoj lokalnoj zajednici žive mnoge mlade talentovane osobe koje jednostavno do sada nisu imale priliku ispoljiti svoje umijeće.

## BERKOVIĆI DOBILI MODERAN RESURSNI CENTAR

Svjesni činjenice da nevladin sektor u opštini Berkovići nije na zadovoljavajućem nivou, a da je jedan od glavnih uzroka nedostatak adekvatnog prostora za rad organizacija civilnog društva, Savez udruženja Partnerska grupa Berkovići je osmislio projekat pod nazivom „Jačanje nevladinog sektora kroz izgradnju Resursnog centra“.

Iako na prvi pogled jednostavan, ovaj projekat je obuhvatio brojne aktivnosti od velikog strateškog značaja i predstavlja temelj na kojem će se moći graditi buduće građanske inicijative. Osnovna ideja projekta je bila omogućiti osnovne uslove za funkcionisanje organizacija civilnog društva (OCD) na području Berkovića, odnosno stvaranje prostora u kojem bi se održavali sastanci, obuke, prezentacije, diskusije i razni drugi događaji u vezi sa aktivnim djelovanjem civilnog društva. Upravo zbog nedostatka takvog prostora u prošlosti se odustajalo od brojnih inicijativa.

U saradnji sa Opštinom obezbijeđeno je zemljište, a nakon što je uspješno odabran izvođač radova, izgradnja i opremanje centra završena je u predviđenom roku, pa je

ova lokalna zajednica napokon dobila reprezentativan objekat za nesmetano funkcionisanje nevladinog sektora.

**„U ime Opštine Berkovići želim izraziti izuzetno zadovoljstvo što je naša lokalna zajednica izabrana za jednu od četrnest partnerskih jedinica lokalne samouprave (JLS) u okviru LOD IV projekta. Također, izražavam zadovoljstvo što je nevladin sektor u Berkovićima dobio reprezentativan objekat u kojem će se donositi važne odluke i pisati dobri projekti“**, kazao je prilikom otvaranja Centra Nenad Abramović, načelnik opštine.

Resursni centar poslužit će OCD-u za sastanke, prezentacije, izrade projekata, diskusije, javne rasprave o bitnim pitanjima za razvoj zajednice, radionice za izgradnju tehničkih kapaciteta civilnog sektora i druge događaje.

**„Izgradnjom Centra riješen je problem nedostatka prostornih kapaciteta OCD-a. Očekujem da će ovo biti novi dom za sve nevladine organizacije koji će omogućiti nastanak kvalitetnih projekata što će u konačnici dovesti do zadovoljenja potreba krajnjih korisnika i samim tim opravdati svrhu**

**postojanja civilnog sektora“**, riječi su Duška Domazeta predsjednika Udruženja roditelja djece i omladine sa posebnim potrebama „Ruka nade“, koje će od sada svoje aktivnosti obavljati znatno lakše.

Drugom fazom projekta predviđena je petodnevna radionica za 20 predstavnika lokalnih OCD-a, na temu „Ruralni razvoj i unapređenje lanca vrijednosti u privredi i turizmu“, koja ima za cilj osposobiti i uključiti predstavnike lokalnih nevladinih organizacija u analizu i programiranje intervencija (projekata) ključnih za razvoj opštine. Na taj način OCD će pripremiti i elemente za novu Razvojnu strategiju Opštine Berkovići za period 2016-2025. čime će direktno učestvovati u stvaranju boljih uvjeta za život svih građana.



# ORGANIZOVANI DODATNI TRENINZI ZA ORGANIZACIJE CIVILNOG DRUŠTVA

**Stečena znanja i vještine od iznimne su važnosti za efikasan rad OCD-a, odnosno za razvoj i implementaciju njihovih projekata**

Nakon što su raspisale Javne pozive za predaju projektnih prijedloga jedinice lokalne samouprave (JLS), koje učestvuju u projektu LOD IV, uvidjele su potrebu za organizovanjem dodatnih treninga „Upravljanje projektnim ciklusom (PCM)” za organizacije civilnog društva (OCD).


Iako su početkom IV faze LOD projekta već organizovani treninzi kojima su ojačani kapaciteti OCD-a iz oblasti pisanja projektnih prijedloga sa konkretnim objašnjenjima kako tačno aplicirati za sredstva koja su obezbijedena u ovoj fazi LOD-a, utvrđeno je da bi organizovanje dodatnih treninga povećao broj prijavljenih projektnih prijedloga na javne pozive lokalnih zajednica. Većina OCD-a u lokalnim zajednicama jednostavno nisu navikle na novi način finansiranja, jer je raniji uobičajeni način dobijanja sredstava bio vezan za podnošenje zahtjeva koji nije imao propisanu strukturu, precizan plan aktivnosti i budžet, kao ni elemente analize stanja u sektoru u kojem se želi unaprijediti nešto.

Tako su u saradnji sa JLS održani dodatni PCM treninzi za OCD sa područja Žepča, Maglaja i Visokog, gdje su predstavnicima nevladinih organizacija prezentirana

osnovna znanja o upravljanju projektnim ciklusom kako bi mogle sa kvalitetno osmišljenim i napisanim projektnim prijedlozima aplicirati na javne pozive lokalnih zajednica u kojima djeluju.

Također, polaznicima obuke predstavljena je metodologija kreiranja projektnih prijedloga koju mogu koristiti za apliciranje i na javne pozive koje objavljuju drugi domaći i međunarodni donatori, posebno Evropska unija. Riječ je o LOD metodologiji koja ima za cilj da pruži jasne procedure za transparentnu dodjelu sredstava OCD, uz osiguranje jačanja međusobnog povjerenja. Pravilnom upotrebom LOD metodologije putem maksimalizacije iskorisćenosti (efikasnog i efektivnog trošenja) sredstava dodijeljenih OCD, doprinosi se ostvarivanju razvojnih ciljeva lokalnih zajednica. Uz projektni pristup, JLS svoje ciljeve, koji su postavljeni u strategijama razvoja, realizuju zajedno sa OCD.

**„Obuka PCM koja se izvodi u okviru LOD projekta je korisna za sve učesnike kako za početnike, tako i za one koji već imaju iskustva u pisanju projekata. Smatram da su nakon obuke učesnici svjesniji kako im je to jedini put ka vlastitoj održivosti i na-**



**micanju sredstava od različitih donatora koji će podržati jedino kvalitetno osmišljene i strukturirane projekte, koji su dobro definisani i objektivno napisani”,** riječi su Elmide Sarić, izvršne direktorice Training i konsalting organizacije „Izbor plus”.

Stečena znanja i vještine od iznimne su važnosti za efikasan rad OCD-a, odnosno za razvoj i implementaciju njihovih projekata. Kroz ove obuke predstavnici OCD-a se također potiču da preuzmu aktivniju ulogu u svojoj lokalnoj sredini, da poboljšaju svoje usluge, te da djeluju u skladu sa lokalnim razvojnim strategijama.

U narednom periodu planirano je da se dodatni PCM treninzi za OCD održe u Novom Sarajevu, Doboju, Cazinu, Brčkom distriktu, Bijeljini i Kotor Varošu.

## RJEČNIK EU POJMOVA

**Program Evropske unije za istraživanje i inovacije – Horizon 2020 (EU Framework Programme for Research and Innovation)**

Horizon 2020. je najveći program za istraživanje i inovacije koji je ikada pokrenut u Evropskoj uniji. U razdoblju od 2014. do 2020. dostupno je gotovo 80 milijardi eura za finansiranje istraživanja koja će dovesti do više ključnih otkrića, pronalazaka i inovacija prenošenjem sjajnih ideja iz laboratorija na tržište.

Cilj je osigurati da Evropa stvara znanost i tehnologiju na svjetskoj razini koje će pokrenuti privredni rast, te ponuditi rješenje pitanja građana EU o njihovoj materijalnoj sigurnosti, općoj sigurnosti i okolišu, kao i jačanja globalne pozicije EU u istraživanjima, inovacijama i tehnologijama.

Struktura programa Horizon 2020. temelji se na tri glavna prioriteta, a to su: izvrsna znanost, industrijsko vodstvo i društveni izazovi. Ovom programu se 1. jula 2014. godine pridružila i Bosna i Hercegovina.

**Evropska fondacija za obuku (ETF) – (European Training Foundation)**

Evropska fondacija za obuku (ETF) je specijalizovana agencija Evropske unije, čije je sjedište u Torinu. ETF pruža stručnu podršku Evropskoj komisiji i partnerskim zemljama u oblasti reforme politika razvoja ljudskog kapitala shodno ciljevima spoljnih odnosa EU. Svrha postojanja fondacije jeste pružanje pomoći zemljama u tranziciji i razvoju kako da koriste potencijal ljudskog kapitala kroz reformu sistema obrazovanja, osposobljavanja i tržišta rada u kontekstu politike spoljnih odnosa EU.

# BRISSEL DOMAĆIN PRVOG SASTANKA VIJEĆA ZA STABILIZACIJU I PRIDRUŽIVANJE IZMEĐU BIH I EU

Vijeće je pozdravilo stupanje na snagu Sporazuma o stabilizaciji i pridruživanju i pohvalilo BiH za napredak u 2015. na putu prema EU

Šest mjeseci od stupanja na snagu Sporazuma o stabilizaciji i pridruživanju (SSP) između Evropske unije i Bosne i Hercegovine održan je prvi sastanak Vijeća za stabilizaciju i pridruživanje između BiH i EU. Sastankom, koji je održan u Briselu i koji će imati važno mjesto u novijoj historiji BiH, predsjedavala je Federica Mogherini, visoka predstavnica Unije za vanjske poslove i sigurnosnu politiku i potpredsjednica Evropske komisije, u svojstvu predsjedavajućeg Vijeća za vanjske poslove, dok je delegaciju BiH predvodio predsjedavajući Vijeća ministara Denis Zvizdić, koji je bio u pratnji zamjenika predsjedavajućeg Vijeća ministara i ministra vanjske trgovine i ekonomskih odnosa Mirka Šarovića te ministra vanjskih poslova Igora Crndaka.

Vijeće je pozdravilo stupanje na snagu Sporazuma o stabilizaciji i pridruživanju i pohvalilo BiH za napredak u 2015. na putu prema EU. Vijeće se pozvalo na obnovljeni pristup ka BiH, koji su poduprli zaključci Vijeća EU od 15. i 16.12.2014. godine, zaključci Vijeća od 16.3.2015. kao i zaključci od 12.10.2015, koji su pozdravili usvajanje Reformske agende od strane vlasti BiH. Ovo usvajanje je označi-



lo važan korak ka kredibilnoj implementaciji obaveza koje je poduzelo rukovodstvo BiH, čime se BiH vratila na reformske tračnice koje su potrebne da bi država napredovala na svom putu ka EU.

Također, Vijeće EU je pozvalo BiH da održi pozitivni zalet nastavljanjem implementacije reformi, u saradnji sa civilnim društvom. Potreban je i značajan napredak u provedbi Reformske agende, te da se posebna pažnja usmjeri na poboljšavanje socioekonomske situacije kako bi se napravio daljnji napredak u EU integracijama.

Vijeće je podsjetilo da će Sporazum o stabilizaciji i pridruživanju pomoći BiH da uskladi svoje zakonodavstvo i politike sa pravnom stečevinom EU u ključnim oblastima, stvarajući novi poticaj za privredu i ekonomsku dobrobit građana zemlje, kao i dodatne prilike za preduzeća iz BiH i EU.

Sporazum o stabilizaciji i pridruživanju će ostati u centru odnosa između EU i BiH sve do pristupanja, a Vijeće je pozdravilo i Strategiju i Izvještaj o Bosni i Hercegovini koje je Evropska komisija usvojila 10.11.2015. godine.



# HISTORIJSKI TRENUTAK: BIH PREDALA ZAHTJEV ZA ČLANSTVO U EU

**EU procjenjuje spremnost zemalja koje podnesu zahtjev za članstvo na osnovu tri kriterijuma, a riječ je o političkim i ekonomskim kriterijumima, te kriterijumima pravne tekovine EU**

Jedna od vijesti koja bi mogla obilježiti 2016. godinu svakako je ona koja stiže iz Brisela gdje je 15.02. Bosna i Hercegovina podnijela zahtjev za članstvo u Evropskoj uniji. Bh. aplikaciju za članstvo u EU je Bertu Koendersu, ministru vanjskih poslova Holandije, uručio Dragan Čović, predsjedavajući Predsjedništva BiH, a svečanoj ceremoniji su prisustvovali i visoka izaslanica za vanjsku i sigurnosnu politiku EU-a i potpredsjednica Evropske komisije Federica Mogherini i komesar za evropsku politiku susjedstva i pregovore o proširenju Johannes Hahn.

**„Ovo će biti godina velikih reformi i mi se na ovom putu više nećemo zaustaviti. Želimo sustići svoje susjede, a posebno Hrvatsku koja je već u EU. Budite uvjereni da smo svjesni da je to naš posao i veselim se našim zajedničkim uspjesima“, kazao je Čović tom prilikom.**

Holandski ministar je kazao kako Vijeće EU pozdravlja ovaj korak BiH, te dodao: **„Ovo je jako važna stvar i želim posebno spomenuti reformsku agendu i akcioni plan. Jako je važno da sve što ste uradili protekle godine bude nastavljeno. Imple-**

**mentacija reformi u saradnji sa civilnim društvom. Vijeće će razmotriti aplikaciju i kada bude smatralo da je napravljen napredak i da BiH ispunjava sve na vrijeme, učinit ćemo i da aplikaciju dovedemo na novi korak. Budućnost BiH je u vašim rukama, u bliskoj saradnji sa nama.“**

Nakon podnošenja zahtjeva Vijeće EU-a će zatražiti od Evropske komisije da izradi mišljenje što može potrajati godinu do dvije.

Prvi korak u tom u procesu je upitnik koji Komisija šalje zemlji podnositeljici zahtjeva s nekoliko hiljada pitanja koja se odnose na osnovne podatke o zemlji, političkom i pravnom sistemu, ekonomskom potencijalu, strukturi stanovništva, te usklađenosti s evropskim zakonodavstvom.

Odgovori na upitnik predstavljaju glavni element procesa prikupljanja informacija, ali ne i jedini. Pored njega, Komisija organizuje brojne stručne misije i procjene u kojima učestvuju stručnjaci zemalja članica EU, prvenstveno radi provjere nivoa provođenja zakona. Komisija također dobija izvještaje nezavisnih stručnjaka, te održava konsultacije sa organizacijama civilnog društva, međunarodnim organizacijama i drugim zainteresovanim stranama kako bi dobila informacije za procjenu.

Bitno je naglasiti kako EU procjenjuje spremnost zemalja koje podnesu zahtjev za članstvo na osnovu tri kriterijuma za pristup koji su definisani na sastanku Evropskog vijeća u Kopenhagenu 1993. godine i nazivaju se „Kriterijumi iz Kopenhagena“. Konkretno, riječ je o političkim i ekonomskim kriterijumima, te kriterijumima pravne tekovine EU.

Isto tako, kada je u pitanju Zapadni Balkan, zemlje koje apliciraju moraju ispuniti i uslove iz Sporazuma o stabilizaciji i pridruživanju koji se tiču regionalne saradnje i dobrosusjedskih odnosa. Na osnovu toga, Evropska komisija će u svom mišljenju ocijeniti može li BiH dobiti kandidatski status i koje uslove za to treba ispuniti.

Po završetku procesa formulacije mišljenja, Komisija predstavlja mišljenje Vijeću EU. Mišljenje predstavlja solidnu osnovu za diskusiju na osnovu koje Vijeće EU donosi političku odluku o sljedećim koracima u procesu pristupanja EU.

Da je riječ o dugotrajnom i složenom procesu najbolje ilustruje činjenica da je Republika Hrvatska svoj zahtjev za članstvom u EU podnijela 2003. godine, a da je 10 godina kasnije postala punopravni član evropske porodice.





50  
YEARS

*Empowered lives. Resilient nations.*

A woman with short brown hair, wearing a dark blue blazer over a black top, is speaking at a dark, polished wooden podium. The podium features the United Nations emblem on the right side. Two microphones are positioned in front of her. The background is a large, textured green wall.

# FLASH VIJESTI

## Predstavници LOD-a na konferenciji u Ukrajini



UNDP i Vlada Ukrajine su početkom decembra prošle godine u Kijevu organizovali konferenciju stručnjaka u oblasti decentralizacije i reforme javne uprave iz Centralne i Istočne Europe, Kavkaza i Centralne Azije. Cilj sastanka koji je okupio više od 150 učesnika, među kojima su se našli i predstavnici LOD-a iz naše zemlje, je razmjena relevantnih iskustava, ideja i naučenih lekcija, te pronalaženje inovativnih opcija za reforme i saradnju u regionu.

Delegaciju iz BiH su činili Samir Omerefenđić, rukovodilac LOD projekta, Nataša Čavka (Udruženje „DON“ Prijedor), Sanja Stojčinović (Gradska uprava Doboj) i Emina Osmanagić (XY organizacija Sarajevo), koji su imali priliku da iz prve ruke prenesu iskustva iz naše zemlje i podijele uspješne prakse koje su napravljene tokom prethodnih godina u JLS koje učestvuju u projektu.



Osim prezentacije uspješnih projekata na konferenciji „Decentralizacija i lokalna samouprava - inovacije i mogućnosti u Europi i Euroaziji“ doneseni su brojni zaključci i kreirane inovativne ideje koje će učesnici konferencije moći implementirati u svojim lokalnim sredinama, a sve u cilju poboljšanja odnosa na relaciji JLS i OCD.

## Održan sastanak načelnika i gradonačelnika opština i gradova koji učestvuju u LOD IV projektu

U Sarajevu je sredinom decembra prošle godine održan okrugli sto pod nazivom „LOD metodologija u praksi“ na kojem su prisustvovali načelnici i gradonačelnici opština i gradova koji učestvuju u LOD IV projektu, te predstavnici UNDP-a. Osnovni cilj okruglog stola je bio da se prezentiraju projektni rezultati ostvareni u 2015. godini, te da se kroz otvorenu diskusiju razmjene dosadašnja iskustva te naglasi važnost LOD metodologije kao mehanizma za transparentnu dodjelu finansijskih sredstava OCD-u. Pored toga, prezentiran je pregled stanja i rezultata u provođenju LOD metodologije u partnerskim i pridruženim JLS. LOD IV je do sada podržao 63 projekta koji uključuju oko 9.500 korisnika, a čija ukupna vrijednost iznosi 1.110.000 USD.



Navedeno je da je LOD nakon šest godina i četiri projektne faze postao značajan i prepoznatljiv brend jednako kao i LOD metodologija za transparentnu raspodjelu sredstava namijenjenih OCD-u, a istaknuto je i da je LOD intervencija prepoznata izvan granica Bosne i Hercegovine te je zahvaljujući dobrim rezultatima projekat preporučen za replikaciju u zemljama zapadnog Balkana.

## U Dvorovima uspješno sanirani Dom kulture i Mjesna kancelarija

„Regionalno udruženje amputiraca Bijeljina“ uspješno je realizovalo projekat sanacije Doma kulture, Mjesne kancelarije i Matičnog ureda u naselju Dvorovi. Navedeni objekti su stradali u katastrofalnim poplavama 2014., a

početkom 2016. godine su u potpunosti sanirani i postali su funkcionalni za građane.

Na taj način je stanovnicima ovog dijela opštine Bijeljina omogućeno pružanje administrativnih usluga, a stvoreni su uvjeti za oživljavanje kulturnih i društvenih dešavanja. Bitno je naglasiti, kako su u okviru realizacije projekata izgrađene i pristupne rampe za osobe sa invaliditetom što je za „Regionalno udruženje amputiraca Bijeljina“ veoma značajno, jer su većina njihovih članova upravo invalidne osobe.



Obnovljeni objekti Doma kulture, Mjesne kancelarije, te Matičnog ureda u Dvorovima pružaju usluge za 12.500 građana koji žive na ovom području.

## BiH se pridružila obilježavanju Dana sigurnosti na internetu

Prema podacima koje je objavio Eurostat, u Evropskoj uniji je u 2015. godini 25 posto korisnika interneta imalo neku vrstu problema sa sigurnošću na internetu, kao što su virusi koji ugrožavaju rad uređaja, zloupotreba ličnih podataka, finansijski gubici ili internetski sadržaj neprikladan za djecu.

EU je nedavno preduzela značajne korake kako bi osnažila povjerenje korisnika u internet, između ostalog sporazumima o uspostavljanju pravila o cyber sigurnosti i boljoj zaštiti podataka na nivou EU. Stoga su inicijative poput Dana sigurnosti na internetu koji se obilježava 9. februara ključne za promovisanje sigurnijeg i odgovornijeg korištenja interneta i mobilne telefonije, naročito među djecom i mladima.

Ove godine Dan sigurnosti na internetu je obilježen u preko 100 zemalja u svijetu pod sloganom „Odigray svoju ulogu za bolji internet“, čemu se pridružila i naša zemlja. Cilj njegovog obilježavanja je podizanje svijesti o mogućnosti zloupotreba djece i mladih putem informacionih i komunikacionih tehnologija.

# REKLI SU O LOD-u




**NERMIN OGRIŠEVIĆ,**  
načelnik Općine Cazin

„U Strategiji razvoja Općine Cazin, organizacije civilnog društva su prepoznate kao

jedan od ključnih partnera. Stoga je podrška njihovom razvoju i uključivanju u razvojne procese definirana kao jedna od mjera u implementaciji naše Strategije. Općina Cazin nastoji da uspostavi dugoročan angažman na jačanju organizacija civilnog društva i njihovih kapaciteta kako bi se praktično mogao realizirati demokratski potencijal OCD-a za sveukupni razvoj savremenog bosansko-hercegovačkog društva. Finansiranje projekata odabranih putem javnog poziva vodi ka razvoju i unapređenju partnerskih odnosa sa organizacijama civilnog društva i predstavlja prvi korak izgradnje novih odnosa lokalne zajednice i nevladinog sektora, kao i

uspostavljanju mehanizama za transparentniji postupak dodjele finansijskih sredstava kroz primjenu LOD metodologije.

Uz sve ovo, učešćem u LOD IV projektu, dobili smo priliku da unaprijedimo i vlastite kapacitete, s obzirom da su službenici koji rade na ovom projektu prošli intenzivne treninge iz oblasti upravljanja projektnim ciklusom. Osim poboljšanja saradnje sa organizacijama civilnog društva, to će doprinijeti i kvalitetnijim te uspješnijim projektnim prijedlozima s kojima Općina Cazin aplicira na različite pozive za finansiranje projekata prema domaćim i međunarodnim institucijama.“



## Potražite više o LOD projektu

Ukoliko vas zanimaju dosadašnje aktivnosti u okviru LOD projekta, kao i naše buduće, planirane projektne aktivnosti posjetite našu web stranicu <http://www.ba.undp.org> ili nas potražite na našoj Facebook stranici [www.facebook.com/ProjekatLOD](https://www.facebook.com/ProjekatLOD). Facebook stranica LOD projekta sadrži informacije o aktivnostima LOD IV projekta, partnerskih jedinica lokalne samouprave, implementiranih projekata, kao i informacije o opštem djelovanju nevladinog sektora i omladinskih organizacija u BiH. Dovoljno je da kliknete "Sviđa mi se" (Like) i dobivat ćete aktuelne informacije o projektima i tekućim aktivnostima koje vas zanimaju. Možete nas pratiti i na Twitteru putem hashtaga #LOD4. Prethodna izdanja LOD biltena možete pronaći i preuzeti na internetskim stranicama [www.ngo.ba](http://www.ngo.ba) i [www.ba.undp.org](http://www.ba.undp.org).